



2 Mi por lesa

Bon invento

1.



Kasi tur kos ku tin na skol òf na kas, hende a inventá un dia. Laga mi kontá bo di algun invento masha bon.

3.



Den djins òf karson tin zip. Den shimis òf saya tin zip. Den buts òf lars tin zip.

Bo sa kon zip a nase? Un mener ku yama Judson tabatin un amigu ku tabata sufri di doló di lomba.

Tur dia e tabata pasa trabou pa mara su feternan di buts. Mener Judson kier a yuda su amigu i asina el a bini riba e idea di traha un zip pa e butsnan.

2.



Antes tur beibi tabata bisti bruki di tela. Un yuchi ta susha su bruki vários biaha pa dia. Bo mes por pensa kuantu paña pa laba e mamanan tabatin den e tempu ei. Riba un dia mener Viktòr Mills a inventá un bruki ku por usa i tira afó despues.

El a inventá e bruki pa su ñetu. For di e dia ei tin pèmper i tur mama ku tata ta kontentu.

4.



Antes polis tabata regla tráfiiko. Na komienso di siglo pasá nan a pone e promé lus di tráfiiko eléktriko na un krusada na Merka.

E promé lus di tráfiiko tabatin lus kòrá i bèrdè so.

Despues a bini lus oraño aserka.

5.



Bo ke sa kon nan a inventá 'potato chips'? Un dia un merikano riku a bai kome den un restaurant. E no tabata gusta e batata ku nan a sirbié. El a manda su kuminda bèk kushina. E kòki, mener Crum, a rabia. Pa malu el a slais e batatanan pa e merikano mashá fini mes. El a hasa nan den zeta i pone salu ariba. Pero e merikano a haña e batata hasá masha dushi. El a hasi propaganda i asina 'potato chips' a nase.

6.



Hopi, hopi aña pasá ya tabatin plancha. Nan tabata traha plancha di djente di bestia. Tambe nan tabata pone djente di oro aserka.

Despues a bin plancha ku djente di ivor. Hende pober no por a paga un plancha asina. Nan tabata keda sin djente. Ta siglo pasá numan a kuminsá traha plancha di rùber.

3 Bo a komprendé?

- Promé bo yùfrou òf mener ta lesa e kuenta.
- Despues abo ta les'é.
- Bo a komprendé e historia?

Pregunta

1. Ki sorto di bruki beibinan tabata bisti ántes?
2. Ken a inventá bruki ku por usa i tira afó despues?
3. Pa ken e mener a inventá e bruki ei?
4. Kon bini mener Judson a kai riba e idea pa inventá zip?
5. Ken tabata regla tráfiiko ántes?
6. Na unda e promé lus di tráfiiko a paresé?
7. Kua koló di lus e promé lus di tráfiiko tabatin?
8. Kiko a pasa dia un merikano riku a bai kome den un restaurant?
9. Dikon kòki Crum a slais e batatanan di e merikano riku masha fini mes?
10. Kiko e kòki a hasi ora el a kaba di hasa batata pa e merikano?
11. Kon 'potato chips' di e kòki rabiá a bira konosí?
12. Di kiko e promé planchanan tabata trahá?
13. Ki tempu a kuminsá traha plancha di rùber?